

DECRÊT LEGJISLATÎF dai 12 di Setembar dal 2002, n. 223

te Gazete Uficiâl N. 240 dai 12 di Otubar dal 2002

Normis di atuazion dal statût speciâl de regjon Friûl-Vignesie Julie pal trasferiment di funzions in materie di tutele de lenghe e de culture des minorancis linguistichis storichis inte regjon

IL PRESIDENT DE REPUBLICHE

Viodût l'articul 87, come cuint, de Costituzion;

Viodude la leç costituzionâl dai 31 di Zenâr dal 1963, n. 1, che e à fat bon il statût speciâl de regjon Friûl-Vignesie Julie;

Sintude la Comission paritetiche previodude dal articul 65 dal statût speciâl;

Viodude la deliberazion dal Consei dai Ministris, adotade inte riunion dai 25 di Lui dal 2002;

Su propueste dal President dal Consei dai Ministris e dal Ministri pai afârs regjonâi, in convigne cui Ministris de economie e des finansis, dal interni e de istruzion, de universitàt e de ricercje;

Al emane il decret legjislatîf ca sot:

Art. 1.

1. Tignint cont di ce che al è previodût de leç dai 23 di Fevrâr dal 2001, n. 38, "Normis pe tutele de minorance linguistiche slovene de regjon Friûl-Vignesie Julie", la atuazion intal teritori dal Friûl-Vignesie Julie des disposizions de leç dai 15 di Dicembar 1999, n. 482, di culi indenant clamade "leç", pe tutele de lenghe e de culture des popolazions che a fevelin il furlan e di chês de minorance slovene e gjermanofone, e je disciplinade des normis di chest articul.

2. La Regjon e proviôt cun propriis disposizions legjislativis al esercizi di funzions di coordinament dai compits assegnâts aes istituzions scolastichis autonomis in atuazion de discipline previodude dal articul 4 de leç, in materie di ûs de lenghe de minorance inte scuele materne e in materie di insegnament de lenghe de minorance intes scuelis elementârs e secondariis di prin grât.

3. I tocje ae Regjon ancje l'esercizi di dutis lis funzions amministrativis peadis ae atuazion des disposizions previodudis dai articui 9 e 15 de leç e di ogni altre disposizion che e tocji la discipline dal davuelziment di compits des amministrazions publichis locâls.

4. Pal finanziament des funzions specificadis tal come 3, e je riservade an par an ae Regjon une assegnazion finanziarie speciâl di cjamâ sui stanziaments corispondents autorizâts dal bilanç dal Stât pai obietîfs de leç.

Chest decret, munît dal sigjîl dal Stât, al sarà metût inte Racuelte uficiâl dai ats normatîfs de Republiche taliane. Al è un oblic di ducj chei che ur tocji, di rispietâlu e di fâlu rispietâ.